

**DAP: Gugurkan pendakwaan bawah Akta Hasutan
MalaysiaKini.com
12 Julai, 2012**

Penasihat DAP Lim Kit Siang berkata peguam negara perlu menggugurkan pendakwaan mengikut Akta Hasutan yang dijalankan sebelum ini untuk membuktikan keikhlasan kerajaan memansuhkan undang-undang itu.

Katanya, pendakwaan yang dilakukan ke atas pengerusi DAP Karpal Singh dan pemimpin HRP P Uthayakumar mengikut akta itu perlu digugurkan, selari dengan pengumuman Perdana Menteri Datuk Seri Najib Razak malam tadi.

MP Ipoh Timor itu berkata, undang-undang itu telah lama digunakan secara terpilih dan diskriminasi oleh pihak berkuasa untuk mengekang kebebasan bersuara dan menghukum pemimpin pembangkang.

Tambahnya, Najib dalam ucapannya pada Hari Malaysia tahun lalu mengumumkan pemansuhan undang-undang ISA, Ordinan Darurat, pindaan ke atas Akta Polis serta Akta Penerbitan dan Mesin Cetak dan juga pengenalan Akta Perhimpunan Aman.

Katanya, rakyat Malaysia bagaimanapun masih sangsi dengan program transformasi politik Najib itu apabila melihat tindakan polis ke atas perhimpunan BERSIH 3.0 dan juga kempen untuk memburuk-burukkan penganjur dan peserta perhimpunan 28 April itu.

Perdana Menteri Datuk Seri Najib Tun Razak pada malam tadi mengumumkan Akta Hasutan 1948 akan dimansuhkan dan digantikan dengan akta baru yang dikenali sebagai Akta Keharmonian Nasional.

Katanya tindakan itu dijalankan bagi mencari mekanisme yang menentukan keseimbangan terbaik antara keperluan menjamin kebebasan bersuara setiap warga negara dan keperluan menangani kompleksiti kemajmukan yang wujud di negara ini.